

Na osnovu člana 6. stava 1. i 5. i člana 10. stav 1. tačka 1. Zakona o nacionalnim savetima nacionalnih manjina („Službeni glasnik RS“, broj 72/09, 20/14 – odluka US, 55/14 i 47/18) i člana 14. Statuta Bošnjačkog nacionalnog vijeća broj 1073-12/2017 od 21.12.2017. godine, Bošnjačko nacionalno vijeće u Republici Srbiji je na sjednici održanoj, dana 08. decembra 2018. godine, utvrdilo prečišćen tekst Statuta Bošnjačkog nacionalnog vijeća u Republici Srbiji.

Prečišćen tekst Statuta Bošnjačkog nacionalnog vijeća u Republici Srbiji, sadrži Statut Bošnjačkog nacionalnog vijeća broj 1073-12/2017 od 21.12.2017. godine i Odluku o izmjenama i dopunama Statuta Bošnjačkog nacionalnog vijeća u Republici Srbiji broj: 53-09/2018 od 08. decembra 2018. godine.

STATUT BOŠNJAČKOG NACIONALNOG VIJEĆA U REPUBLICI SRBIJI

I OSNOVNE ODREDBE

Član 1.

Statut je najviši pravni akt Bošnjačkog nacionalnog vijeća u Republici Srbiji (u daljem tekstu Vijeće), kojim se uređuju, ovlaštenja Vijeća, ustrojstvo i način izbora organa i tijela, kao i druga pitanja od značaja za rad Vijeća, u skladu sa Ustavom i zakonom.

Član 2.

Vijeće je predstavničko tijelo odnosno organizacija bošnjačke nacionalne manjine u Republici Srbiji, preko kojeg pripadnici bošnjačke nacionalne manjine ostvaruju svoja prava na manjinsku samoupravu u oblasti obrazovanja na bosanskom jeziku, bošnjačke kulture, službene upotrebe bosanskog jezika i pisma i informisanja na bosanskom jeziku i drugih prava u skladu sa Ustavom i zakonom.

Član 3.

Naziv Vijeća na srpskom jeziku i ćiriličnom pismu glasi: Национални савет бошњачке националне мањине.

Radi očuvanja kontinuiteta i prepoznatljivosti kod pripadnika bošnjačke nacionalne manjine i šire javnosti, naziv Vijeća koji će se službeno i u pravnom prometu koristiti ravnopravno sa nazivom na srpskom jeziku je: Bošnjačko nacionalno vijeće u Republici Srbiji.

Član 4.

Vijeće ima svojstvo pravnog lica, koje stiče upisom u Registar nacionalnih savjeta, koji se vodi kod ministarstva nadležnog za poslove ljudskih i manjinskih prava.

Vijeće predstavlja i zastupa predsjednik Vijeća.

Član 5.

Sjedište Vijeća je u Novom Pazaru, ul. 28. novembra bb.

Simboli Vijeća

Član 6.

Simboli Vijeća su grb i zastava.

Grb Vijeća je u obliku evropskog štita koji je podijeljen bijelom lentom koja ide dijagonalno iz gornjeg lijevog ugla ka desnoj strani. Na lijevoj dijagonalnoj polovini grba, na plavoj podlozi su tri ljiljana zlatno žute boje, jednake veličine ravnomjerno raspoređeni ispod donjeg ruba lente. Na desnoj dijagonalnoj polovini, na zelenoj podlozi, su tri bijela polumjeseca otvorena prema desnoj strani, raspoređeni u obliku jednakostraničnog trougla.

Zastava Vijeća je bijele boje sa grbom, opisanim u stavu 2. ovog člana, u sredini.

Član 7.

Vijeće ima pečat sa dvojezičnim tekstom i štambilj.

Pečat Vijeća je okruglog oblika.

Oko oboda pečata ispisan je tekst na srpskom jeziku i ćirilničnim pismom: „Национални савет бошњачке националне мањине – Нови Пазар“, a u prvom narednom redu ispisan je tekst na bosanskom jeziku i latiničnim pismom: „Bošnjačko nacionalno vijeće u Republici Srbiji“, sa utisnutim nacionalnim grbom bošnjačke nacionalne manjine u sredini, ispod koga stoji: „Novi Pazar“.

Upotreba pečata uređuje se posebnom odlukom.

Izgled i upotreba štambilja uređuje se posebnom odlukom

Nagrade i priznanja Vijeća

Član 8.

Nacionalne nagrade i priznanja Bošnjačkog nacionalnog vijeća u Republici Srbiji su: Povelja Kulina bana, Dukat Isa-bega Ishakovića, Medalja Rifat Burdžović Tršo, Pero Ćamila Sijarića i Plaketa Bošnjačkog nacionalnog vijeća.

Povelja Kulina bana

Povelja Kulina bana je najveće nacionalno priznanje Bošnjaka. Dodjeljuje se pojedincima za životno djelo ili pak nacionalnim institucijama za izuzetna ostvarenja.

Nagrada se dodjeljuje 11. maja, na Dan bošnjačke nacionalne zastave.

Dukat Isa-bega Ishakovića

Dukat Isa-bega Ishakovića je nacionalna nagrada Bošnjaka koja se dodjeljuje pojedincima ili nacionalnim institucijama u oblasti ukupnog kulturnog stvaralaštva.

Nagrada se dodjeljuje povodom obilježavanja Dana bošnjačke nacionalne zastave, 11. maja.

Medalja Rifat Burdžović Tršo

Nagrada Medalja Rifat Burdžović Tršo se dodjeljuje pojedincima ili nacionalnim institucijama za doprinos u oblastima javnih djelatnosti, politike, ljudskih prava i za doprinos ideji multietničkog i multikulturalnog društva.

Nagrada se dodjeljuje na Dan Sandžaka, 20. novembra.

Pero Ćamila Sijarića

Nagrada Pero Ćamila Sijarića se dodjeljuje pojedincima u oblasti književnosti.

Plaketa Bošnjačkog nacionalnog vijeća

Plaketa Bošnjačkog nacionalnog vijeća se dodjeljuje institucijama i pojedincima za izuzetan doprinos u zaštiti i unapređenju položaja i ostvarivanja prava i sloboda Bošnjaka.

Nacionalne nagrade dodjeljuju se odlukom stručne komisije koju obrazuje predsjednik Vijeća na prijedlog Izvršnog odbora.

II SASTAV VIJEĆA

Član 9.

Izbor za članove Vijeća vrši se na osnovu Zakona.

Mandat članova Vijeća traje četiri godine od dana potvrđivanja mandata.

Članovi Vijeća vrše svoju funkciju u cilju ostvarivanja individualnih i kolektivnih prava pripadnika bošnjačke nacionalne manjine na području Republike Srbije, u skladu s Ustavom Republike Srbije, zakonima i Statutom

Član 10.

Vijeće ima 35 članova.

Vijeće punovažno odlučuje ako sjednici prisustvuje većina od ukupnog broja članova Vijeća.

Odluke se donose većinom glasova prisutnih članova, ukoliko Zakonom, Statutom ili Poslovníkom o radu Vijeća nije drukčije određeno.

Sjednice Vijeća se održavaju prema potrebi, a najmanje jednom u šest mjeseci.

III PRAVA I OBAVEZE ČLANOVA VIJEĆA

Član 11.

Član Vijeća ima pravo da:

1. učestvuje u predlaganju, pripremanju, donošenju, izvršavanju i kontroli izvršavanja odluka Vijeća;
2. postavi pitanje i zatraži objašnjenje od organa Vijeća i da dobije odgovor u cilju ostvarivanja prava iz tačke 1. ovog člana;
3. zatraži i dobije stručnu pomoć od organa Vijeća u cilju vršenja svoje funkcije.

Član Vijeća ima obavezu da:

1. aktivno učestvuje u radu Vijeća, Izvršnog odbora ili odbora čiji je član;
2. pismeno ili usmeno obavijesti predsjednika Vijeća, predsjednika Izvršnog odbora, predsjednika Odbora čiji je član ili Glavni ured Vijeća u slučaju spriječenosti da prisustvuje sjednici ili ako je spriječen da izvrši zaduženje ili neki nalog;
3. izvršava odluke ili naloge organa Vijeća i da o tome podnosi izvještaj.

Član 11a.

Članu Vijeća – vijećniku mandat traje koliko traje mandata Vijeća i može biti ponovo izabran.

Vijećniku mandat prestaje prije isteka mandata Vijeća:

- 1) podnošenjem ostavke;
- 2) gubitkom jednog od općih uslova za sticanje aktivnog biračkog prava;
- 3) ako duže od godinu dana ne prisustvuje sjednicama Vijeća;
- 4) ako mu prestane prebivalište na teritoriji Republike Srbije;
- 5) ako je konačnom odlukom nadležnog organa brisan iz posebnog biračkog spiska;
- 6) ako je konačnom presudom osuđen za krivično djelo na kaznu zatvora u trajanju dužem od šest mjeseci;
- 7) u slučaju smrti.

Vijećnik je dužan da ovjeri ostavku kod nadležnog organa za ovjeru potpisa i da je Vijeću podnese u roku od tri dana od dana ovjere, neposredno ili poštom preporučeno.

Prestanak mandata vijećniku konstatuje Vijeće na prvoj narednoj sjednici nakon prijema obavještenja o nastupanju razloga za prestanak mandata.

O prestanku mandata vijećniku prije isteka mandata Vijeću, predsjednik Vijeća obavještava Republičku izbornu komisiju i nadležno ministarstvo.

Kada vijećniku prestane mandat prije isteka mandata Vijeću, mandat se dodjeljuje prvom sljedećem kandidatu sa izborne liste na kojoj se nalazio vijećnik kome je prestao mandat.

Vijećniku prestaje mandat konstituisanjem novog saziva Vijeća.

Član 12.

Pravo članova organa Vijeća i drugih tijela Vijeća na izgublenu zaradu, putne troškove za dolazak i odlazak na sjednice organa i tijela Vijeća i na naknadu drugih troškova vezanih za vršenje poslova i zadataka iz ovlaštenja Vijeća uređuje se posebnom odlukom Izvršnog odbora Vijeća.

Član 13.

Vijeće može imati počasne članove.

Za počasnog člana može biti imenovano lice koje je svojim djelovanjem dalo izuzetan doprinos unapređenju položaja i prava pripadnika bošnjačke nacionalne manjine u Republici Srbiji.

Na prijedlog predsjednika Vijeća, predsjednika odbora ili najmanje jedne trećine članova Vijeća, Vijeće može donijeti odluku o dodjeljivanju statusa počasnog člana. Odluka se donosi većinom glasova od ukupnog broja članova Vijeća.

Počasni član nema pravo glasa u Vijeću.

Počasni član može biti član radnog tijela Vijeća.

IV OVLAŠTENJA VIJEĆA

Opća ovlaštenja

Član 14.

Vijeće, u skladu sa zakonom i svojim Statutom, preko svojih organa samostalno:

- 1) donosi i mijenja Statut Vijeća;
- 2) donosi finansijski plan, finansijski izvještaj i završni račun;
- 3) raspolaže sopstvenom imovinom;
- 4) bira i razrješava predsjednika i potpredsjednike Vijeća, predsjednika i članove Izvršnog odbora Vijeća, predsjednika i članove odbora Vijeća, članove Savjeta Vijeća i članove stalnih i povremenih radnih tijela Vijeća;
- 5) postavlja i razrješava sekretara Vijeća;
- 6) odlučuje o nazivu, simbolima i pečatu Vijeća;
- 7) utvrđuje prijedloge nacionalnih simbola, znamenja i bošnjačkih nacionalnih blagdana (praznika);
- 8) ustanovljava i dodjeljuje priznanja;
- 9) osniva ustanove, udruženja, fondacije, privredna društva u oblastima kulture, obrazovanja, informisanja i službene upotrebe jezika i pisma;
- 10) daje saglasnost odnosno mišljenje na Statut, program rada, finansijski plan, završni račun, odluku o statusnim promjenama, odluku o udruživanju, o unutrašnjem ustrojstvu i sistematizaciji poslova u ustanovama i drugim pravnim licima u kojima je osnivač;

- 11) predlaže predstavnika Bošnjaka u Savjetu za međunacionalne odnose u jedinici lokalne samouprave;
- 12) predlaže Republici, Autonomnoj pokrajini ili jedinici lokalne samouprave kao osnivaču ustanove, utvrđivanje ustanove od posebnog značaja u skladu sa zakonom;
- 13) inicira odnosno predlaže Republici, Autonomnoj pokrajini ili jedinici lokalne samouprave kao osnivaču ustanove, koja je, u skladu sa zakonom, utvrđena za ustanovu od posebnog značaja za Bošnjake, prenos osnivačkih prava;
- 14) inicira donošenje i prati sprovođenje zakona i drugih propisa iz oblasti kulture, obrazovanja, informisanja i službene upotrebe jezika i pisma;
- 15) učestvuje u pripremi zakona i drugih propisa i inicira donošenje odnosno izmjene i dopune zakona i drugih propisa kojima se uređuju Ustavom garantovana prava Bošnjaka u oblasti kulture, obrazovanja, informisanja i službene upotrebe jezika i pisma;
- 16) inicira donošenje, odnosno izmjene i dopune posebnih propisa i privremenih mjera u oblastima u kojima se ostvaruje pravo na samoupravu, radi postizanja pune ravnopravnosti između Bošnjaka i građana koji pripadaju većini;
- 17) podnosi pritužbu Zaštitniku građana, pokrajinskom i lokalnom ombudsmanu i drugom nadležnom organu, kada procijeni da je došlo do povrede Ustavom i zakonom garantovanih prava i sloboda Bošnjaka;
- 18) podnosi pritužbu iz tačke 17) ovog člana u ime pripadnika nacionalne manjine;
- 19) zauzima stavove, pokreće inicijative i preduzima mjere u vezi sa svim pitanjima koja su neposredno povezana sa položajem, identitetom i pravima Bošnjaka;
- 20) po potrebi osniva područne urede;
- 21) donosi svoj poslovnik;
- 22) po potrebi donosi opća pravna akta;
- 23) odlučuje o drugim pitanjima koja su mu povjerena zakonom.

Član 14a.

Ovlaštenja iz člana 14. stav 1. tačka 11) 12) 13) 14) 15) 16) 17) 18) 19) i 20) može vršiti i Izvršni odbor Vijeća.

Vijeće ili Izvršni odbor Vijeća mogu podnijeti ministarstvima i posebnim organizacijama prijedloge, inicijative i mišljenja o pitanjima u vezi sa vršenjem ovlaštenja predviđenih zakonom i ovim Statutom.

Vijeće ili Izvršni odbor Vijeća mogu podnijeti inicijativu Vladi za ukidanje, odnosno poništenje propisa ministarstava i posebnih organizacija, koji nisu u skladu sa odredbama zakona i drugih propisa, a koji se odnose na Bošnjake.

Vijeće ili Izvršni odbor Vijeća mogu davati prijedloge, inicijative i mišljenja o pitanjima koja se odnose na položaj i na očuvanje posebnosti Bošnjaka organima Autonomne pokrajine i organima jedinice lokalne samouprave.

Ovlaštenja iz oblasti obrazovanja

Član 15.

Vijeće ima pravo pojedine ustanove obrazovanja i odgoja proglasiti ustanovama od posebnog značaja za Bošnjake, pod uslovima i na način propisan zakonom i Statutom.

Ustanova od posebnog značaja za obrazovanje pripadnika bošnjačke nacionalne manjine je ustanova obrazovanja i odgoja, čiji je osnivač Republika, Autonomna pokrajina, jedinica lokalne samouprave ili Vijeće, u kojoj se tradicionalno ili u značajnoj mjeri ostvaruje Ustavom zagarantovano pravo pripadnika bošnjačke nacionalne manjine na obrazovanje i odgoj na bosanskom jeziku.

U ustanovi iz stava 2. ovog člana Vijeće učestvuje u upravljanju, u skladu sa zakonom.

Ustanovom od posebnog značaja za obrazovanje pripadnika bošnjačke nacionalne manjine može se proglasiti ustanova obrazovanja i odgoja u kojoj se nastava izvodi na bosanskom jeziku.

Ustanovom iz stava 2. ovog člana može se proglasiti:

- 1) po jedna ustanova osnovnog i srednjeg obrazovanja i odgoja, u kojoj se nastava izvodi na bosanskom jeziku, odnosno i na bosanskom jeziku, ukoliko je u lokalnoj samoupravi broj ustanova u kojima se nastava izvodi i na bosanskom jeziku manji od četiri;
- 2) najviše jedna četvrtina (1/4) od ukupnog broja ustanova osnovnog i srednjeg obrazovanja i odgoja u kojima se nastava izvodi na bosanskom jeziku, odnosno i na bosanskom jeziku, ukoliko je u lokalnoj samoupravi broj ustanova u kojima se nastava izvodi i na bosanskom jeziku veći od četiri;
- 3) osnovna škola, u kojoj nastavu na bosanskom jeziku pohađa najmanje 1/3 učenika i srednja škola, u kojoj nastavu na bosanskom jeziku pohađa najmanje 90 učenika, ukoliko u jedinici lokalne samouprave postoji ustanova određenog nivoa obrazovanja koja je proglašena za ustanovu od posebnog značaja za obrazovanje bošnjačkog nacionalne manjine;
- 4) osnovna škola u jedinici lokalne samouprave u kojoj se zbog opadanja broja stanovnika usljed negativnog prirodnog priraštaja i emigracije pripadnici bošnjačke nacionalne manjine moraju posebno zaštititi garantovanjem dodatnih prava.

Odluku o proglašenju ustanove obrazovanja i odgoja za ustanovu od posebnog značaja za Bošnjake može donijeti i Izvršni odbor Vijeća, na prijedlog nadležnog odbora odnosno Bošnjačkog prosvjetnog savjeta, uz saglasnost predsjednika Vijeća.

Član 16.

U ustanovama predškolskog odgoja i obrazovanja, osnovnog i srednjeg obrazovanja i odgoja čiji je osnivač Republika, Autonomna pokrajina ili jedinica lokalne samouprave, u kojima se obrazovno-odgojni rad izvodi i na bosanskom jeziku, ili u kojima se izučava bosanski jezik ili kultura bošnjaka kao poseban nastavni predmet, Vijeće:

- 1) daje mišljenje o predloženim kandidatima za članove upravnog, odnosno školskog odbora - predstavnicima jedinice lokalne samouprave;
- 2) predlaže članove upravnog, odnosno školskog odbora - predstavnike jedinice lokalne samouprave u ustanovi u kojoj se u većini odjeljenja obrazovno-odgojni rad izvodi na bosanskom jeziku ili za koju je, u skladu sa zakonom i statutom, utvrđeno da je od posebnog značaja za obrazovanje Bošnjaka;
- 3) daje mišljenje o kandidatu za direktora ustanove iz stava 1. ovog člana;

U ustanovama učeničkog i studentskog standarda čiji je osnivač Republika, Autonomna pokrajina ili jedinica lokalne samouprave, Vijeće:

- 1) predlaže jednog člana - predstavnika osnivača i daje mišljenje o ostalim kandidatima za članove upravnog odbora ustanova učeničkog standarda, čije je sjedište na teritoriji jedinice lokalne samouprave u kojoj je bosanski jezik u službenoj upotrebi;
- 2) daje mišljenje o kandidatima za članove upravnih odbora ustanova studentskog standarda čije je sjedište na teritoriji jedinice lokalne samouprave u kojoj je bosanski jezik u službenoj upotrebi;
- 3) daje mišljenje u postupku izbora direktora ustanova učeničkog i studentskog standarda čije je sjedište na teritoriji jedinice lokalne samouprave u kojoj je bosanski jezik u službenoj upotrebi;
- 4) daje mišljenje u postupku razrješenja direktora i članova organa upravljanja iz stava 2. tač. 1) do 3) ovog člana.

U oblasti visokog obrazovanja u ustanovama čiji je osnivač Republika, nacionalni savjet:

- 1) određuje predstavnika koji sa pravom odlučivanja učestvuje u radu Nacionalnog savjeta za visoko obrazovanje, u pitanjima od značaja za izvođenje nastave na bosanskom jeziku kada se u okviru visokog obrazovanja u cjelini ili djelimično izvodi nastava na bosanskom jeziku;
- 2) daje mišljenje o kandidatima predloženim za organ poslovođenja i organ upravljanja visokoškolske ustanove u kojoj se nastava u cjelini ili djelimično izvodi na bosanskom jeziku.

Član 17.

U oblasti nastavnih planova i programa Vijeće:

- 1) predlaže ministru nadležnom za poslove obrazovanja i odgoja osnove programa predškolskog obrazovanja i odgoja, program nastave i učenja osnovnog i srednjeg obrazovanja i odgoja i osnove vaspitnog programa, za sadržaje koji izražavaju posebnost Bošnjaka, a naročito iz oblasti historije, muzičkog odgoja i likovne umjetnosti;
- 2) predlaže ministru nadležnom za poslove obrazovanja i odgoja program nastave i učenja osnovnog i srednjeg obrazovanja i odgoja za bosanski jezik i bosanski jezik sa elementima nacionalne kulture;
- 3) daje mišljenje ministru nadležnom za poslove obrazovanja i odgoja na nastavne programe srpskog jezika, kao nematernjeg;

- 4) predlaže ministru nadležnom za poslove obrazovanja i odgoja mjere i program odgojnog rada sa učenicima u ustanovama učeničkog standarda, koji se odnose na afirmaciju međuetničke tolerancije i multikulturalizma;
- 5) daje mišljenje na školski i odgojni program ustanova za koje je utvrđeno da su od posebnog značaja za bošnjačku nacionalnu manjinu.

Član 18.

Vijeće predlaže ministru nadležnom za poslove obrazovanja i odgoja plan udžbenika na bosanskom jeziku i pismu i udžbenika za predmete od posebnog značaja za bošnjačku nacionalnu manjinu.

Vijeće daje prethodnu saglasnost u postupku odobravanja rukopisa udžbenika, priručnika, dodatnih nastavnih sredstava, nastavnih pomagala, didaktičkih sredstava i didaktičkih igrovnih sredstava na bosanskom jeziku i pismu, u skladu sa zakonom. Ukoliko Vijeće ne dostavi odgovor izdavaču u roku od 30 dana od dana dostavljanja zahtjeva izdavača za davanje prethodne saglasnosti, smatraće se da je saglasnost data.

Član 19.

Vijeće:

- 1) proglašava obrazovno-odgojne ustanove od posebnog značaja za obrazovanje Bošnjaka, u skladu sa zakonom i Statutom, i predlaže osnivaču utvrđivanje tog statusa, u skladu sa zakonom i Statutom;
- 2) predlaže:
 - jednog zajedničkog predstavnika nacionalnih vijeća za člana Nacionalnog prosvjetnog savjeta;
 - ministarstvu nadležnom za poslove obrazovanja i odgoja odobravanje van konkursa, programe stalnog stručnog usavršavanja nastavnika, vaspitača i stručnih saradnika na bosanskom jeziku, u inostranstvu, radi priznavanja u procesu vrednovanja rada nastavnika;
 - ministarstvu nadležnom za poslove obrazovanja i odgoja takmičenja učenika osnovnih i srednjih škola u inostranstvu koja će biti bodovana u skladu sa propisima;
- 3) daje mišljenje:
 - u postupku donošenja akta o mreži predškolskih ustanova i osnovnih škola u jedinici lokalne samouprave u kojoj je u službenoj upotrebi bosanski jezik ili u kojoj se obrazovno-odgojni rad izvodi na bosanskom jeziku;
 - ministru nadležnom za poslove obrazovanja i odgoja, odnosno pokrajinskom organu nadležnom za poslove obrazovanja u postupku utvrđivanja mreže srednjih škola i ustanova učeničkog i studentskog standarda;
 - ministru nadležnom za poslove obrazovanja i odgoja, odnosno pokrajinskom organu nadležnom za poslove obrazovanja u postupku davanja saglasnosti na otvaranje odjeljenja na bosanskom jeziku za manje od 15 učenika;

- u postupku utvrđivanja broja učenika za upis u srednju školu na bosanskom jeziku, kao i u postupku određivanja broja učenika za sticanje stručne osposobljenosti prekvalifikacije, dokvalifikacije i specijalizacije na bosanskom jeziku;
 - u postupku raspodjele mjesta u ustanovama učeničkog i studentskog standarda;
 - u postupku donošenja akta o mreži ustanova učeničkog i studentskog standarda čiji je osnivač Republika, Autonomna pokrajina ili jedinica lokalne samouprave;
 - u postupku raspodjele sredstava iz budžeta Republike, Autonomne pokrajine i jedinice lokalne samouprave koja se dodjeljuju putem javnog konkursa ustanovama i udruženjima u oblasti obrazovanja;
- 4) određuje predstavnika koji prisustvuje sjednici Nacionalnog prosvjetnog savjeta i učestvuje u njegovom radu bez prava glasa, kada Nacionalni prosvjetni savjet razmatra pitanja od značaja za obrazovanje Bošnjaka;
 - 5) ustanovljava stipendije iz sopstvenih sredstava i svojim aktima propisuje kriterijume i postupak odlučivanja o dodjeli stipendija i sprovodi postupak za dodjeljivanje;
 - 6) učestvuje u praćenju i unaprijeđivanju kvaliteta obrazovanja odraslih koje se ostvaruje na bosanskom jeziku;
 - 7) obavlja i druge poslove iz ove oblasti utvrđene zakonom i drugim propisima.

Ovlaštenja u oblasti kulture

Član 20.

Vijeće može, u skladu sa zakonom, osnivati ustanove kulture radi očuvanja, unapređenja i razvoja kulturne posebnosti i očuvanja nacionalnog identiteta Bošnjaka i vršiti prava i obaveze osnivača.

Ustanove iz stava 1. ovog člana Vijeće može osnivati samostalno ili zajedno sa Republikom, autonomnom pokrajinom, jedinicom lokalne samouprave ili drugim pravnim licem, u skladu sa zakonom.

Republika, Autonomna pokrajina i jedinica lokalne samouprave kao osnivači ustanova iz stava 1. ovog člana, koje su, u skladu sa zakonom, utvrđene za ustanove od posebnog značaja, mogu u cjelini ili djelimično prenijeti osnivačka prava na Vijeće.

Član 21.

Ustanova kulture čije se programske djelatnosti pretežno odnose na proučavanje, očuvanje i predstavljanje bošnjačke kulture u Republici Srbiji, a u skladu sa brojem pripadnika bošnjačke nacionalne manjine na teritoriji na kojoj obavlja djelatnosti, kao i ukoliko su te programske djelatnosti od naročitog značaja za zadovoljavanje kulturnih potreba specifičnih za Bošnjake, je ustanova od posebnog značaja za Bošnjake.

Na prijedlog Vijeća, osnivač, izmjenom osnivačkog akta, može utvrditi da je ustanova kulture od posebnog značaja za Bošnjake.

U ustanovama kulture, za koje je izmjenom osnivačkog akta utvrđeno da su od posebnog značaja za Bošnjake, Vijeće:

- 1) imenuje najmanje jednog člana upravnog odbora ustanove;
- 2) daje mišljenje o predloženim članovima upravnog odbora ustanove;
- 3) daje mišljenje u postupku izbora direktora ustanove.

Član 22.

Vijeće:

- 1) utvrđuje koje su ustanove i manifestacije u oblasti kulture od posebnog značaja za očuvanje, unapređenje i razvoj posebnosti i nacionalnog identiteta Bošnjaka;
- 2) utvrđuje strategiju razvoja kulture Bošnjaka;
- 3) utvrđuje koja su pokretna i nepokretna kulturna dobra od posebnog značaja za bošnjačku nacionalnu manjinu;
- 4) pokreće postupak pred nadležnim organom ili ustanovom za utvrđivanje statusa zakonom zaštićenih pokretnih i nepokretnih kulturnih dobara od značaja za bošnjačku nacionalnu manjinu;
- 5) predlaže preduzimanje mjera zaštite, sanacije i rekonstrukcije kulturnih dobara iz stava 1. tačka 4) ovog člana;
- 6) daje mišljenja i prijedloge u postupku izrade prostornih i urbanističkih planova u jedinici lokalne samouprave u kojoj se nalaze kulturna dobra iz stava 1. tačka 3) ovog člana;
- 7) predlaže obustavljanje izvršenja prostornih i urbanističkih planova ako smatra da se time ugrožavaju kulturna dobra iz stava 1. tačka 3) ovog člana;
- 8) daje prethodno mišljenje nadležnom organu u postupku izdavanja dozvole za premještanje nepokretnog kulturnog dobra iz stava 1. tačka 3) ovog člana na novu lokaciju;
- 9) daje mišljenje u postupku osnivanja ili ukidanja biblioteka ili organizacionih jedinica biblioteka koji imaju fond knjiga na bosanskom jeziku;
- 10) daje prijedlog za raspodjelu sredstava koja se dodjeljuju putem javnog konkursa iz budžeta Republike, autonomne pokrajine ili jedinice lokalne samouprave ustanovama, manifestacijama i udruženjima bošnjačke nacionalne manjine u oblasti kulture;
- 11) u koordinaciji sa drugim vijećima predlaže dva, ili najviše dvostruko veći broj kandidata za izbor dva člana Nacionalnog savjeta za kulturu;
- 12) u koordinaciji sa drugim vijećima organizuje postupak predlaganja kandidata za članove Nacionalnog savjeta za kulturu;
- 13) odlučuje o drugim pitanjima koja su mu povjerena zakonom.

Ovlaštenja iz oblasti obavještanja

Član 23.

Vijeće može, u skladu sa zakonom, da osnuje ustanove i privredna društva radi ostvarivanja prava na javno informisanje na bosanskom jeziku, odnosno fondacije radi ostvarivanja opštekorisnog cilja unaprijeđivanja javnog informisanja na bosanskom jeziku.

Član 24.

Vijeće:

- 1) donosi strategiju razvoja informisanja na bosanskom jeziku, u skladu sa strategijom u oblasti javnog informisanja Republike Srbije;
- 2) daje prijedlog za raspodjelu sredstava za projekte, koji se prilažu na javni konkurs koji raspisuje organ javne vlasti, radi podizanja kvaliteta informisanja pripadnika bošnjačke nacionalne manjine;
- 3) daje prijedloge i preporuke upravnim odborima i programskim savjetima javnih medijskih servisa u vezi sa programima na jezicima nacionalnih manjina;
- 4) daje mišljenje o kandidatu za odgovornog urednika programa na bosanskom jeziku u javnim medijskim servisima;
- 5) daje mišljenje na izvještaj Programskog savjeta javnih servisa u vezi sa programskim sadržajima na bosanskom jeziku.

Član 25.

U koordinaciji sa drugim nacionalnim vijećima, Vijeće učestvuje, u skladu sa zakonom utvrđenom procedurom, u predlaganju kandidata za člana Savjeta regulatornog tijela za elektronske medije.

Ovlaštenja iz oblasti službene upotrebe bosanskog jezika i pisma

Član 26.

Vijeće:

- 1) utvrđuje tradicionalne nazive jedinica lokalne samouprave, naseljenih mjesta i drugih geografskih naziva na bosanskom jeziku, ako je na području jedinice lokalne samouprave ili naseljenog mjesta jezik nacionalne manjine u službenoj upotrebi; nazivi koje je utvrdio nacionalni savjet postaju nazivi u službenoj upotrebi pored naziva na srpskom jeziku i objavljuju se u "Službenom glasniku Republike Srbije i službenom glasilu jedinice lokalne samouprave;
- 2) predlaže nadležnom organu isticanje naziva jedinica lokalne samouprave, naseljenih mjesta i drugih geografskih naziva na bosanskom jeziku;
- 3) predlaže utvrđivanje bosanskog jezika i pisma kao službenog jezika i pisma u jedinici lokalne samouprave;

- 4) predlaže promjenu naziva ulica, trgova, gradskih četvrti, zaselaka, drugih dijelova naseljenih mjesta kao i ustanova za koje je utvrđeno da su od posebnog značaja za bošnjačku nacionalnu manjinu;
- 5) daje mišljenje u postupku utvrđivanja naziva ulica, trgova, gradskih četvrti, zaselaka i drugih dijelova naseljenih mjesta, ako je na području jedinice lokalne samouprave ili naseljenog mjesta bosanski jezik u službenoj upotrebi;
- 6) predlaže nadležnom organu vršenje nadzora nad službenom upotrebom bosanskog jezika i pisma;
- 7) inicira objavljivanje najvažnijih zakona Republike Srbije na bosanskom jeziku i pruža stručnu i drugu pomoć, u skladu sa svojim mogućnostima, u postupku prevođenja;
- 8) preduzima mjere i aktivnosti za unapređenje službene upotrebe bosanskog jezika i pisma;
- 9) odlučuje o drugim pitanjima iz ove oblasti koja su mu povjerena zakonom.

Član 26a.

Ovlaštenja iz člana 16. stava 1. tačka 1) – 3), stava 2. tačka 1) – 4), stava 3. tačka 1) i 2), člana 17, člana 18, člana 19. tačka 2) – 6), člana 21. stav 2. i stav 3, člana 22. stav 1. tačka 4) – 13), člana 24. stav 1. tačka 2) – 5), člana 25. i člana 26. stav 1. tačka 2) – 8) vrši Izvršni odbor na prijedlog nadležnog odbora uz pribavljenu saglasnost predsjednika ili nadležnog potpredsjednika Vijeća.

V ORGANI I RADNA TIJELA VIJEĆA

Član 27.

Organi Vijeća su: predsjednik Vijeća, Izvršni odbor i odbori za obrazovanje, službenu upotrebu jezika i pisma, kulturu, informisanje, nadzor i kontrolu ostvarivanja prava Bošnjaka u Republici Srbiji.

Savjeti Vijeća su: Savjet visokih bošnjačkih zvaničnika i legitimno izabranih predstavnika – Senat, Savjet za odnose sa vjerskim zajednicama, Predsjednički savjet, Bošnjački prosvjetni savjet i Savjet za dijasporu.

Mandat svih organa Vijeća, izabranih, imenovanih i postavljenih lica, odbora, savjeta i radnih tijela traje četiri (4) godine.

Predsjednik Vijeća

Član 28.

Predsjednik Vijeća bira se iz reda članova Vijeća na prijedlog najmanje jedne trećine članova Vijeća, javnim glasanjem, prozivkom, većinom od ukupnog broja članova Vijeća.

Prijedlog za izbor predsjednika Vijeća mora biti sačinjen u pismenom obliku i potpisan od strane svih predlagača.

Predsjedavajući proziva članove Vijeća po redoslijedu koji je utvrđen Rješenjem o dodjeli mandata koje je donio državni organ nadležan za sprovođenje izbora.

Svaki prozvani član Vijeća izgovara riječ „ZA“, „PROTIV“ ili „UZDRŽAN“. Predsjedavajući ponavlja ime i prezime člana Vijeća koji je glasao i njegovu izjavu, odnosno utvrđuje da je odsutan ili da ne želi da glasa.

Predsjedavajući zapisuje izjavu člana Vijeća ili njegovu odsutnost, uz njegovo ime i prezime na spisku.

Predsjednik Vijeća je izabran kada predsjedavajući konstatuje da je za njega glasala većina od ukupnog broja članova Vijeća.

Ukoliko su predložena dva ili više kandidata, članovi Vijeća koji pristupaju glasanju izgovaraju puno ime i prezime kandidata za kog glasaju.

Ako u prvom krugu glasanja nijedan od predloženih kandidata ne dobije potrebnu većinu, u drugom krugu glasati će se o dva kandidata koja su u prethodnom krugu imala najveći broj glasova.

U drugom krugu izabran je kandidat koji dobije većinu glasova od ukupnog broja članova Vijeća.

Ako ni u drugom krugu nijedan od predloženih kandidata ne dobije potrebnu većinu glasova, postupak kandidovanja i izbora se ponavlja.

Član 29.

Vijeće ima četiri potpredsjednika.

Potpredsjednici Vijeća biraju se iz reda članova Vijeća, javnim glasanjem, većinom od ukupnog broja članova Vijeća, na prijedlog predsjednika Vijeća.

Potpredsjednici Vijeća zadužuju se za jednu ili više oblasti iz djelokruga rada Vijeća.

Potpredsjednici Vijeća pomažu predsjedniku Vijeća u vršenju poslova iz njegovog djelokruga i vrše poslove za koje ih ovlasti Vijeće ili predsjednik Vijeća.

Potpredsjednike Vijeća bira Vijeće, u postupku predviđenim Poslovníkom o radu Vijeća.

Član 30.

Predsjednik i potpredsjednici Vijeća za svoj rad odgovaraju Vijeću.

Ovlaštenja predsjednika Vijeća

Član 31.

Predsjednik Vijeća:

- 1) predstavlja i zastupa Vijeće;
- 2) utvrđuje i vodi generalnu politiku između dvije sjednice Vijeća;
- 3) usmjerava i usklađuje rad organa Vijeća;
- 4) predlaže plan rada Vijeća;

- 5) predlaže način rješavanja pitanja o kojima odlučuje Vijeće;
- 6) predlaže kandidate za potpredsjednike Vijeća;
- 7) predlaže kandidate za predsjednika, potpredsjednika i članove Izvršnog odbora Vijeća;
- 8) predlaže kandidata za sekretara Vijeća;
- 9) podnosi izvještaj o obavljanju povjerenih ovlaštenja;
- 10) na prijedlog Izvršnog odbora donosi odluku o privremenom finansiranju;
- 11) potpisuje odluke Vijeća i zapisnik sa sjednice Vijeća;
- 12) odgovara za zakonitost u poslovanju Vijeća;
- 13) saziva i predsjedava sjednicama Vijeća;
- 14) predlaže dnevni red za sjednicu Vijeća;
- 15) vodi sjednicu Vijeća, daje i oduzima riječ, stara se o redu na sjednici, prekida sjednicu i izriče mjere u skladu sa Poslovníkom Vijeća;
- 16) predlaže vrijeme za raspravu, skidanje tačke sa dnevnog reda, zajedničku raspravu o više tačaka dnevnog reda na sjednici Vijeća;
- 17) poziva na glasanje i utvrđuje rezultate glasanja;
- 18) rukovodi radom Predsjedničkog savjeta;
- 19) donosi pojedinačne akte za koje je ovlašten zakonom i Statutom;
- 20) vrši i druge poslove u skladu sa zakonom, Statutom, Poslovníkom i odlukama Vijeća.

U slučaju spriječenosti predsjednika, kao i u slučaju posebnih potreba, predsjednik može ovlastiti potpredsjednika koji će ga zamjenjivati.

Predsjednik ima pravo obustaviti od primjene svaki akt Izvršnog odbora i odbora Vijeća ukoliko smatra da nisu u saglasnosti za zakonom i Statutom.

Izvršni odbor Vijeća

Član 32.

Izvršni odbor Vijeća ima predsjednika, potpredsjednika i 5 članova.

Predsjednika, potpredsjednika i članove Izvršnog odbora bira Vijeće iz reda članova Vijeća, javnim glasanjem, većinom od ukupnog broja članova Vijeća, na prijedlog predsjednika Vijeća.

Mandat Izvršnog odbora traje dok traje mandat onog saziva Vijeća u kojem je izabran.

Član 33.

O kandidatima za predsjednika, potpredsjednika i članove Izvršnog odbora otvara se rasprava.

Po završetku rasprave o prijedlogu za izbor predsjednika, potpredsjednika i članove Izvršnog odbora odlučuje se u cjelini.

Član 34.

Ukoliko predloženi kandidat za izbor predsjednika Izvršnog odbora nije prihvaćen vrši se ponovno glasanje o prijedlogu.

Član 35.

Ukoliko predloženi kandidat za izbor za člana Izvršnog odbora nije izglasan, vrši se ponovno glasanje o prijedlogu.

U slučaju da ni poslije drugog glasanja kandidati za članove Izvršnog odbora ne dobiju potrebnu većinu od ukupnog broja vijećnika, postupak izbora se ponavlja tako što predsjednik Vijeća predlaže nove kandidate.

Član 36.

Članovi Izvršnog odbora Vijeća zadužuju se poslovima i zadacima, u skladu sa zakonom, Statutom i potrebama Izvršnog odbora Vijeća.

Odluku o zaduživanju članova Izvršnog odbora poslovima i zadacima donosi Izvršni odbor Vijeća na svojoj prvoj sjednici na prijedlog predsjednika Izvršnog odbora.

Članovi Izvršnog odbora staraju se o sprovođenju ovlaštenja Vijeća iz oblasti za koju su zaduženi, shodno zakonu i ovom Statutu.

Izvršni odbor Vijeća dužan je podnijeti izvještaj o radu na zahtjev Vijeća ili predsjednika Vijeća.

Član 37 .

Potpredsjednik Izvršnog odbora Vijeća zamjenjuje predsjednika Izvršnog odbora Vijeća u njegovom odsustvu ili po njegovom ovlaštenju u obavljanju poslova propisanih ovim Statutom ili drugim općim aktom.

Član 38.

Predsjednik, potpredsjednik i članovi Izvršnog odbora su odgovorni za svoj rad Vijeću i predsjedniku Vijeća.

Član 39.

Pravila za izbor i razrješenje Izvršnog odbora se utvrđuju Poslovníkom Vijeća.

Ovlaštenja predsjednika Izvršnog odbora

Član 40.

Predsjednik Izvršnog odbora Vijeća:

- 1) saziva i predsjedava sjednicama Izvršnog odbora;
- 2) brine se o poslovima koji su u vezi s radom Vijeća;
- 3) priprema prijedloge odluka iz ovlaštenja Vijeća;
- 4) predlaže plan rada Izvršnog odbora i koordinira rad odbora i radnih tijela Vijeća;
- 5) donosi odluke iz svoje nadležnosti a koje se odnose na efikasnije funkcionisanje Vijeća, Izvršnog odbora, odbora i radnih tijela Vijeća;
- 6) usmjerava rad članova Izvršnog odbora, odbora Vijeća i radnih tijela Vijeća;
- 7) potpisuje odluke Izvršnog odbora i zapisnike sa sjednica Izvršnog odbora.

Član 41.

Izvršni odbor za svoj rad odgovara Vijeću.

Izvršni odbor je obavezan periodično, a najmanje jednom godišnje podnijeti Vijeću izvještaj o svom radu.

Članovi Izvršnog odbora za svoj rad odgovaraju Vijeću i predsjedniku Vijeća.

Poslovi i ovlaštenja Izvršnog odbora Vijeća

Član 42.

Izvršni odbor Vijeća:

- 1) predlaže odluku o usvajanju periodičnog obračuna;
- 2) priprema prijedlog Statuta, finansijskog plana (budžeta), odluke o privremenom finansiranju, finansijskog izvještaja i završnog računa Vijeća;
- 3) utvrđuje prijedloge odluka koje donosi Vijeće;
- 4) sprovodi i kontroliše izvršavanje odluka Vijeća;
- 5) sprovodi povjerena ovlaštenja iz oblasti obrazovanja na bosanskom jeziku, bošnjačke kulture, službene upotrebe bosanskog jezika i pisma i informisanja na bosanskom jeziku;
- 6) razmatra prijedloge o zauzimanju stavova, pokretanja inicijativa i preduzimanja mjera u vezi sa svim pitanjima koja su neposredno povezana sa položajem, identitetom i pravima pripadnika bošnjačke nacionalne manjine;
- 7) u skladu sa ukazanom potrebom donosi pravilnik o unutrašnjoj organizaciji i sistematizaciji radnih mjesta u Vijeću i pravilnik o radu na prijedlog sekretara Vijeća;

- 8) koordinira rad bošnjačkih institucija i organizacija u Republici Srbiji, uspostavlja saradnju sa bošnjačkim institucijama, organizacijama i udruženjima iz Bosne i Hercegovine, država u regionu i dijaspori.
- 9) obavlja i druge poslove koje Vijeće povjeri Izvršnom odboru;
- 10) po potrebi može donositi odluke, preporuke, zaključke, rješenja, mišljenja;
- 11) obavlja i druge poslove koje Vijeće povjeri Izvršnom odboru.

Vijeće može povjeriti Izvršnom odboru odlučivanje o pojedinim pitanjima iz ovlaštenja Vijeća.

Odluke koje je tako donio Izvršni odbor podliježu odobravanju na prvoj narednoj sjednici Vijeća i odobrene su ako za njih glasa više od polovine članova Vijeća.

Ako Vijeće ne odobri odluku Izvršnog odbora, Izvršnom odboru prestaje mandat, a odluka ostaje na snazi.

Član 43.

Izvršni odbor donosi Poslovnik o radu Izvršnog odbora Vijeća koji je u skladu sa Statutom i Poslovníkom Vijeća.

Prestanak mandata predsjedniku, potpredsjedniku i
članovima Izvršnog odbora Vijeća

Član 44.

Predsjedniku, potpredsjedniku i članovima Izvršnog odbora mandat prestaje:

- 1) prestankom mandata člana Vijeća,
- 2) podnošenjem ostavke,
- 3) smrću,
- 4) razrješenjem,
- 5) u drugim slučajevima predviđenim zakonom, Statutom i Poslovníkom.

U slučaju da nastupe razlozi za prestanak mandata predsjedniku, potpredsjednicima i članovima Izvršnog odbora iz stava 1. tačka 1. 2. 3. i 5. ovog člana, Vijeće, bez rasprave, konstatuje prestanak mandata na prvoj narednoj sjednici.

Sekretar Vijeća

Član 45.

Sekretara Vijeća postavlja Vijeće na prijedlog predsjednika Vijeća, javnim glasanjem, većinom glasova od ukupnog broja članova Vijeća.

Za sekretara Vijeća se može postaviti diplomirani pravnik ili lice sa visokom školskom spremom iz oblasti humanističkih nauka.

Član 46.

Sekretar Vijeća:

- 1) koordinira rad svih organa i tijela Vijeća;
- 2) stara se o finansijskom poslovanju Vijeća;
- 3) organizuje sprovođenje odluka Vijeća;
- 4) brine o izvršavanju organizacionih poslova u vezi s radom Vijeća;
- 5) usmjerava rad Glavnog ureda Vijeća u skladu sa odlukama Vijeća;
- 6) vrši kontrolu rada Glavnog ureda Vijeća kao i područnih ureda;
- 7) obavlja poslove koje mu povjeri Vijeće ili Izvršni odbor;
- 8) rješava o pravima, obavezama i odgovornostima iz radnog odnosa zaposlenih, odlučuje o prijemu u radni odnos ili radnom angažovanju lica uz saglasnost Izvršnog odbora;
- 9) u skladu sa ukazanom potrebom predlaže Izvršnom odboru usvajanje pravilnika o unutrašnjoj organizaciji i sistematizaciji radnih mjesta u Vijeću i pravilnik o radu;
- 10) stara se o zakonitom radu Vijeća;
- 11) nadzire izvršavanje odluka Predsjedničkog savjeta.
- 12) prisustvuje sjednicama Vijeća, Izvršnog odbora, odbora i radnih tijela Vijeća s pravom rasprave;
- 13) upozorava Vijeće, predsjednika Vijeća, Izvršni odbor ili radna tijela na postojanje nezakonitosti;
- 14) stara se o sastavljanju zapisnika sa sjednica Vijeća i potpisuje ih;
- 15) stara se o stručnoj pripremi prijedloga odluka Vijeća, Izvršnog odbora ili radnih tijela Vijeća;
- 16) donosi pravilnik o rasporedu i korištenju prostorija Glavnog ureda Vijeća;
- 17) donosi pravilnik o odijevanju u prostorijama Glavnog ureda Vijeća;
- 18) pomaže predsjedniku Vijeća prilikom pripreme i sazivanja sjednice Vijeća;
- 19) vrši i druge poslove po nalogu Predsjednika Vijeća.

U slučaju spriječenosti sekretara da vrši poslove iz svoje nadležnosti propisane Statutom i Poslovníkom, predsjednik Vijeća može imenovati lice koje će zamjenjivati sekretara u obavljanju poslova propisanih Statutom i Poslovníkom. Lice koje zamjenjuje sekretara ima sva prava i dužnosti sekretara Vijeća.

Član 47.

Sekretar Vijeća za svoj rad odgovara Vijeću i predsjedniku Vijeća.

Član 48.

Pravila za postavljenje i razrješenje sekretara Vijeća utvrđuju se Poslovníkom Vijeća.

Odbori

Član 49.

Vijeće ima odbore, i to:

- 1) Odbor za obrazovanje na bosanskom jeziku;
- 2) Odbor za kulturu;
- 3) Odbor za službenu upotrebu bosanskog jezika i pisma;
- 4) Odbor za informisanje na bosanskom jeziku;
- 5) Odbor za nadzor i kontrolu ostvarivanja prava Bošnjaka u Republici Srbiji.

Član 50.

Broj članova odbora Vijeća ne može biti manji od pet (5) ni veći od sedam (7).

Predsjednika, zamjenika predsjednika i članove odbora imenuje Vijeće na prijedlog predsjednika Vijeća, Izvršnog odbora Vijeća ili najmanje jedne trećine (1/3) članova Vijeća.

Prijedlog za imenovanje članova odbora Vijeća mora biti sačinjen u pismenoj formi i mora biti obrazložen.

Radom odbora rukovodi predsjednik odbora, koga u odsustvu i po njegovom ovlaštenju mijenja zamjenik predsjednika odbora.

Predsjednik, zamjenik predsjednika i član odbora ne mogu biti predsjednik i potpredsjednici Vijeća, predsjednik, potpredsjednik i članovi Izvršnog odbora Vijeća.

Predsjednik, zamjenik predsjednika i članovi odbora ne moraju biti članovi Vijeća.

Predsjednika, zamjenika predsjednika i članove odbora imenuje i razrješava Vijeće, većinom glasova prisutnih članova.

Ovlaštenja odbora

Član 51.

Odbori Vijeća:

- 1) pripremaju prijedloge odluka Vijeća i Izvršnog odbora Vijeća;
- 2) pripremaju strategije, planove, programe, platforme i pokreću inicijative za potrebe Vijeće radi ostvarivanja prava Bošnjaka garantovanih Ustavom i zakonom;
- 3) pripremaju strategije, planove, programe, platforme i pokreću inicijative radi ostvarivanja ovlaštenja Vijeća propisanih Ustavom i zakonom;
- 4) daju mišljenja u vezi prijedloga za dnevni red sjednica Vijeća i Izvršnog odbora Vijeća;
- 5) daju saglasnost na zahtjeve, programe, projekte, strategije i planove iz oblasti za koju su obrazovani;

- 6) iniciraju raspravu o pojedinim pitanjima po hitnom postupku;
- 7) donose Poslovnik o radu odbora i druga akta vezana za svoj rad;
- 8) obavljaju i druge poslove u skladu sa zakonom, Statutom i odlukama Vijeća.

VI RADNA TIJELA VIJEĆA

Član 52.

Za razmatranje pojedinih pitanja iz ovlaštenja Vijeća i vršenje drugih poslova u skladu sa zakonom, Statutom i drugim aktima Vijeća, Vijeće može formirati stalna radna tijela, a po potrebi i povremena radna tijela.

Radna tijela ne mogu brojati manje od tri (3) niti više od sedam (7) članova.

Odluku o obrazovanju stalnih i povremenih radnih tijela donosi Vijeće, većinom glasova prisutnih članova, na prijedlog predsjednika Vijeća ili Izvršnog odbora Vijeća.

Na rad stalnih i povremenih radnih tijela primjenjuju se odredbe Poslovnika o radu odbora Vijeća.

VII SAVJETI VIJEĆA

Član 53.

Savjeti Vijeća su: Savjet visokih bošnjačkih zvaničnika i legitimno izabranih predstavnika – Senat, Savjet za odnose sa vjerskim zajednicama, Predsjednički savjet i Bošnjački prosvjetni savjet.

Član 54.

Savjet visokih bošnjačkih zvaničnika i legitimno izabranih predstavnika – Senat (u daljem tekstu: Senat) predlaže Vijeću zauzimanje stavova, pokretanje inicijativa i preduzimanje mjera u vezi sa svim pitanjima koja su neposredno povezana sa položajem, identitetom i pravima pripadnika bošnjačke nacionalne manjine.

Senat radi u stalnom i proširenom sastavu.

Stalni sastav Senata čine: članovi Vijeća – vijećnici, kandidati na izbornim listama za članove Vijeća – vijećnici, sekretar Vijeća, narodni poslanici u Narodnoj skupštini Republike Srbije izabrani sa bošnjačke manjinske izborne liste, predsjednici općina/gradonačelnici izabrani na prijedlog političke stranke bošnjačke nacionalne manjine i predsjednici skupština jedinica lokalne samouprave izabrani na prijedlog političke stranke bošnjačke nacionalne manjine.

Prošireni sastav Senata pored članova navedenih u stavu 3. ovog člana čine i svi odbornici u skupštinama jedinica lokalnih samouprava koji su izabrani sa izborne liste političke stranke bošnjačke nacionalne manjine.

Radom Senata rukovodi predsjednik Vijeća ili lice koje Vijeće izabere, većinom glasova prisutnih članova, na prijedlog predsjednika Vijeća.

Odluku o utvrđivanju stalnog i proširenog sastava Senata donosi Vijeće na prijedlog predsjednika Vijeća, većinom glasova prisutnih članova.

Ostala pitanja od značaja za rad Senata uredit će se posebnom odlukom Vijeća.

Član 55.

Savjet za odnose sa vjerskim zajednicama bavi se saradnjom sa svim vjerskim zajednicama u Srbiji i organizacijom ostvarivanja vjerskih prava Bošnjaka, u skladu sa Ustavom i zakonom.

Broj članova Savjeta za odnose sa vjerskim zajednicama ne može biti manji od 5 ni veći od 11.

Sva pitanja od značaja za rad Savjeta utvrdit će se posebnom odlukom Vijeća.

Članove Savjeta za odnose sa vjerskim zajednicama imenuje i razrješava Vijeće na prijedlog predsjednika Vijeća ili Izvršnog odbora Vijeća, javnim glasanjem, većinom glasova prisutnih članova.

Član 56.

Predsjednički savjet je savjetodavno tijelo Vijeća koje se bavi pitanjima iz nadležnosti predsjednika Vijeća i pomaže mu u radu.

Predsjednički savjet po funkciji čine: predsjednik Vijeća, četiri potpredsjednika Vijeća, predsjednik Izvršnog odbora Vijeća i sekretar Vijeća.

Predsjednički savjet Vijeća:

- 1) daje smjernice za utvrđivanje i vođenje generalne politike između dvije sjednice Vijeća;
- 2) vodi tekuće poslove između sjednica Vijeća;
- 3) razmatra prijedloge dnevnog reda za sjednice Vijeća;
- 4) planira skupove i aktivnosti Vijeća;
- 5) prati i analizira rad izabраниh, imenovanih i postavljenih lica u Vijeću i u ime Vijeća i predlaže mjere;
- 6) razmatra i daje mišljenje o finansijsko-materijalnom poslovanju Vijeća i prijedlogu finansijskog plana, prijedlogu finansijskog izvještaja i predlaže mjere;
- 7) stara se o imovini Vijeća;
- 8) daje smjernice za rad Izvršnog odbora Vijeća;
- 9) daje smjernice za rad resora Vijeća;
- 10) daje smjernice za rad odbora Vijeća;
- 11) razmatra i utvrđuje prijedloge za donošenje i izmjenu Statuta, Poslovnika i drugih općih pravnih akata Vijeća;

- 12) razmatra davanje saglasnosti odnosno mišljenja na Statut, program rada, finansijski plan, završni račun, odluku o statusnim promjenama, odluku o udruživanju, o unutrašnjem, u svojstvu i sistematizaciji poslova u ustanovama u kojima je Vijeće osnivač;
- 13) razmatra prijedloge za osnivanje ustanova, udruženja, fondacija, privrednih društava u oblastima kulture, obrazovanja, informisanja i službene upotrebe jezika i pisma;
- 14) razmatra prijedloge kandidata za organe upravljanja i rukovođenja u pravnim licima čiji je osnivač Vijeće;
- 15) daje prethodno mišljenje Izvršnom odboru kada vrši nadležnosti iz čl. 26a;
- 16) daje prethodno mišljenje Izvršnom odboru kada vrši nadležnosti iz člana 14a.
- 17) daje prethodnu saglasnost na predložene projekte;
- 18) razmatra zahtjeve pravnih i fizičkih lica uz prethodno pribavljeno mišljenje nadležnih Odbora Vijeća.

Član 57.

Sjednice Predsjedničkog savjeta se održavaju po potrebi, a najmanje jednom sedmično.

Predsjednik saziva i predsjedava sjednicama Predsjedničkog savjeta.

Predsjednik naročito:

- 1) otvara i zaključuje sjednice i određuje pauze;
- 2) utvrđuje i prati kvorum za odlučivanje;
- 3) predlaže dnevni red;
- 4) daje riječ članovima Predsjedničkog savjeta;
- 5) obezbjeđuje red na sjednici Predsjedničkog savjeta;
- 6) određuje prekid sjednice;
- 7) predlaže ograničenje trajanja diskusije;
- 8) predlaže odlaganje tačke dnevnog reda;
- 9) daje prijedlog na glasanje;
- 10) utvrđuje rezultate glasanja;

Sjednici Predsjedničkog savjeta, na osnovu poziva predsjednika, mogu prisustvovati, bez prava odlučivanja, lica koja nisu članovi Predsjedničkog savjeta.

Predsjednik može ovlastiti jednog od članova Predsjedničkog savjeta, da u njegovom odsustvu ili usljed njegove spriječenosti, sazove i predsjedava sjednicom Predsjedničkog savjeta.

Član 57a.

Bošnjački prosvjetni savjet je stručno tijelo Vijeća koje se bavi praćenjem razvoja i unapređivanja kvaliteta obrazovanja i odgoja u nastavi na bosanskom jeziku - predškolskog, osnovnog, srednjeg i visokog obrazovanja.

Bošnjački prosvjetni savjet utvrđuje potrebe za studijskim programima na visokoškolskim ustanovama, inicira i daje preporuke nadležnim organima za otvaranje novih studijskih programa, naročito za grupu nacionalnih predmeta.

Savjet može da obrazuje stalne i povremene komisije iz reda nastavnika, stručnih saradnika i drugih istaknutih stručnjaka i naučnika, za pitanja obrazovanja od posebnog značaja i interesa za Bošnjake.

Članove Bošnjačkog prosvjetnog savjeta imenuje i razrješava Vijeće na prijedlog predsjednika Vijeća ili Izvršnog odbora Vijeća, javnim glasanjem, većinom prisutnih članova.

Sva pitanja od značaja za rad Savjeta utvrdit će se posebnom odlukom Vijeća.

Član 57b.

Savjet za dijasporu je savjetodavno tijelo Vijeća koje se bavi: uspostavljanjem saradnje i povezivanjem Bošnjačkog nacionalnog vijeća u Republici Srbiji sa bošnjačkom dijasporom i njihovim organizacijama, informisanjem bošnjačke dijaspore o aktivnostima i radu Vijeća, pomoć bošnjačkoj dijaspori u očuvanju i razvoju bošnjačkog nacionalnog identiteta i posebnosti, te drugim poslovima i projektima od značaja za jačanje veza Bošnjaka iz dijaspore sa svojim sunarodnjacima u jedinicama lokalne samouprave u kojima Bošnjaci tradicionalno žive.

Savjet za dijasporu može obrazovati stalne i povremene komisije iz djelokruga svoga rada.

Članove Savjeta za dijasporu imenuje i razrješava Vijeće na prijedlog predsjednika Vijeća ili Izvršnog odbora Vijeća, većinom glasova prisutnih članova.

VIII SARADNJA SA ORGANIZACIJAMA CIVILNOG DRUŠTVA

Član 58.

Nevladine organizacije, udruženja građana i druge organizacije civilnog društva čiji su ciljevi djelovanja od značaja za zaštitu prava Bošnjaka, zaštitu ljudskih i manjinskih prava, vladavinu prava i pravnu sigurnost, mogu imati konsultativno-participativni status u radu Vijeća

Nevladine organizacije, udruženja građana i druge organizacije civilnog društva za koje Vijeće utvrdi da imaju konsultativno-participativni status, ostvaruju pravo prisustvovanja sjednicama Vijeća, sjednicama odbora i radnih tijela sa pravom učešća u radu bez prava glasa, kao i pravo predlaganja programa i projekata iz oblasti obrazovanja, kulture, informisanja i službene upotrebe jezika i pisma.

Konsultativno-participativni status stiče se u proceduri i na način propisan posebnom odlukom Vijeća.

IX GLAVNI URED VIJEĆA

Član 59.

Za obavljanje poslova u vezi rada Vijeća, Izvršnog odbora Vijeća i radnih tijela Vijeća, pripremanje, izvršavanje i kontrolu izvršavanja odluka Vijeće formira Glavni ured Vijeća.

Radom Glavnog ureda rukovodi šef Glavnog ureda, koji je u stalnom radnom odnosu u Vijeću, ali posao može obavljati i izvan radnog odnosa.

X FINANSIRANJE VIJEĆA

Član 60.

Sredstva za finansiranje rada Vijeća obezbjeđuju se iz budžeta Republike Srbije, budžeta autonomne pokrajine i budžeta jedinice lokalne samouprave, donacija i ostalih prihoda.

Vijeće donosi svoj godišnji finansijski plan (budžet), finansijski izvještaj i završni račun većinom glasova od ukupnog broja članova.

Odgovorno lice za finansijsko poslovanje, podnošenje izvještaja i vođenje knjiga Vijeća je lice koje je zaposleno u Glavnom uredu Vijeća na radnom mjestu rukovodilac Službe za finansije i računovodstvo.

XI PRAVNI AKTI VIJEĆA I OBJAVLJIVANJE AKATA VIJEĆA

Član 61.

Pravni akti Vijeća, organa Vijeća i tijela Vijeća su: Statut, poslovnici, pravilnici, odluke, rješenja, deklaracije, rezolucije, mišljenja, zaključci i preporuke.

Pojedina pravila o donošenju pravnih akata Vijeća i tijela Vijeća regulisati će se posebnom odlukom Vijeća.

Sve odluke i akti Vijeća objavljuju se najkasnije u roku od deset dana od dana stupanja na snagu, odnosno donošenja, na oglasnoj tabli/internet stranici Vijeća.

Prilikom objavljivanja odluka i akata iz stava 3. ovog člana vodi se računa da se ne povrijedi pravo na privatnost i pravo na zaštitu podataka o ličnosti, u skladu sa zakonom.

XII ZAVRŠNE ODREDBE

Član 62.

Statut Vijeća se donosi većinom glasova od ukupnog broja članova Vijeća.

Prijedlog za promjenu Statuta može podnijeti najmanje jedna trećina članova Vijeća ili Izvršni odbor.

Za promjenu Statuta se primjenjuju pravila koja se odnose na njegovo donošenje

Član 63.

Ovaj Statut stupa na snagu osmog dana od objavljivanja na zvaničnoj internet stranici Vijeća.

Stupanjem na snagu ovog Statuta prestaje da važi Statut Bošnjačkog nacionalnog vijeća broj 1073-12/2017 od 21.12.2017. godine.

U Novom Pazaru, 08. decembra 2018. godine.

Broj: 54-12/2018

BOŠNJAČKO NACIONALNO VIJEĆE U REPUBLICI SRBIJI
PREDSJEDNIK

Esad Džudžo